

去腕三寸乃手陽明經之徧歷手陽明之別絡布于四
末與經相干于徧歷之間而別入于太陰之經別其別
行者上循臂乘肩髃上曲頰徧絡于齒又其別者入耳
中合于宗脉實則氣滯而爲齒痛耳聾虛則齒寒痺隔
蓋手陽明主行血氣于皮膚以溫肌肉虛則不行于外
故爲齒寒而痺閉阻隔也○尙御公曰取之別者謂循
齒入耳之別絡非徧歷也十二絡皆同
手少陽之別名曰外關去腕二寸外撻臂主胸中合心主
病實則肘攣虛則不收取之所別也

去腕二寸乃手少陽經之外關少陽之別絡布于四末
與經相干于外關之間外行遶臂注胸中合心主之大
絡病實則肘攣虛則不收少陽厥陰之主筋也

足太陽之別名曰飛揚去踝七寸別走少陰實則鼈窒頭
背痛虛則鼈舁取之所別也

踝上七寸乃足太陽經之飛揚穴足太陽之別絡與經
相干于飛揚之間不入于經俞別走于足少陰之絡實
則鼈窒背痛虛則鼈舁蓋別絡並經而循于頭背也

足少陽之別名曰光明去踝五寸別走厥陰下絡足跗實

則厥虛則痿躄坐不能起取之所別也

踝上五寸乃足少陽經之光明少陽之大絡與經相會
于光明之間別走于厥陰之別絡下絡足跗少陽主初
陽之氣實則膽氣不升而逆于下則爲厥氣虛則爲痿
躄坐不能起

足陽明之別名曰豐隆去踝八寸別走太陰其別者循脛
骨外廉上絡頭項合諸經之氣下絡喉嗌其病氣逆則喉
痺卒痛實則狂顛虛則足不收脛枯取之所別也

去足踝八寸乃足陽明經之豐隆陽明之別絡與經相

會于豐隆之間而別走于足太陰之別絡其別行者並經脉而循于脛骨外廉上絡頭項十五大絡之氣血皆本于胃府水穀之所生是以足陽明之絡與諸經之氣相合其病氣逆則喉痺卒瘕經別之絡于喉嗑也實則氣厥于下而爲顛狂血氣虛則足不收脛枯取之所別也

足太陰之別名曰公孫去本節之後一寸別走陽明其別者入絡腸胃厥氣上逆則霍亂實則腸中切痛虛則鼓脹取之所別也

去足大指本節之後一寸乃足太陰之公孫穴太陰之別絡分布于足與經相干于公孫之間而別走于陽明之絡其別行者入絡腸胃厥氣上逆則爲霍亂氣有餘而實則爲腸中切痛不足而虛則爲鼓脹當取之所別也

足少陰之別名曰大鍾當踝後遶跟別走太陽其別者并經上走于心包下外貫腰脊其病氣逆則煩悶實則閉癰虛則腰痛取之所別也

當踝後遶跟處乃足少陰經之大鍾少陰之別絡與經

相會于大鍾之間而別走于太陽其別行者並經而行
上走于心包絡之下外貫腰脊其病氣逆則煩悶水氣
上乘于心故煩悶實則閉癰別走太陽而膀胱之氣不
化也虛則腰痛腰者腎之府也按手少陽三焦手厥陰
包絡之氣皆本于腎藏之所生故并經上走于心包下
蓋包絡之氣生于腎藏注于絡中並經而上也

足厥陰之別名曰蠡溝去內踝五寸別走少陽其別者經
脛上畢結于莖其病氣逆則臑腫卒疝實則挺長虛則暴
癢取之所別也

去內踝五寸乃是厥陰經之蠡溝厥陰之別絡分布于足與經相干于蠡溝之間而別走于少陽之絡脛足跗罍罍丸卽陰子也莖陰莖乃前之宗筋挺卽陰莖也取之所別者取別走少陽之絡所謂陽取陰而陰取陽左取右而右取左也

任脉之別名曰尾翳下鳩尾散于腹實則腹皮痛虛則癢搔取之所別

按任脉起于中極之下以上毛際循腹裏上關元至咽喉上頤循面入口所謂尾翳者卽鳩尾之上蓋任脉之

別絡出于下極并經而上復下于鳩尾以散于腹絡氣
實則腹皮急虛則癢搔當取之所別絡也

督脉之別名曰長强挾脊上項散頭上下當肩胛左右別
走太陽入貫膂實則脊强虛則頭重高搖之挾脊之有過
者取之所別也

按督脉起于少腹以下骨中央女子入繫庭孔其孔溺
孔之端也其絡循陰器合篡間達篡後別繞臀至少陰
與巨陽中絡者合少陰上股內後廉貫脊屬腎與太陽
起于目內眦上額交巔上入絡腦還出別下項循肩膊

內俠脊抵腰中下循脊絡腎其男子循莖下至篡與女子等其少腹直上者貫齊中央上貫心入喉上頤環唇上繫兩目之下中央蓋督脉總督一身之陽應天道之遠地環轉是以下行而上者循莖至篡從少腹貫齊中央入喉上頤環唇繫口其上行而下者起于目內眦上額交巔下頤俠脊抵腰中而環轉于周身之前後也其督脉之別絡出于長強之分俠脊上行散于頭上是督脉之行于脊脊者從頭項而下行別絡之從下而上行于頭項也虛實者本氣之虛實有過者有過之脉邪氣

之所客也○尙御公曰以有過之脉總結于督脉之後
蓋申明虛實者乃本氣之實虛非邪實也○朱永年曰
按任督之大絡與經脉交相逆順而行當知十二別絡
雖循經並行亦往來逆順者也

脾之大絡名曰大包出淵液下三寸布胸脇實則身盡痛
虛則百節盡皆縱此脉若羅絡之血者皆取之脾之大絡
脉也

大包乃脾經之穴名在足少陽膽經淵液之下三寸脾
之大絡循脾經之大包而四布于胸脇實則身盡痛虛

則百節盡皆縱羅絡之血者謂大絡之血氣散于周身之孫絡皮膚若羅紋之縱橫而絡于身也夫脾之有大絡者脾主爲胃行其津液灌漑于五藏四旁從大絡而布于周身是以病則一身盡痛百節皆縱而血絡之若羅紋以絡于周身足太陰之大絡者止並經而行散血氣于本經之部分是以足太陰脾藏之有二絡也如曰脾足太陰之脉兼是動所生而言也曰足太陰之大絡曰脾之大絡分脾藏經氣而言也

凡此十五絡者實則必見虛則必下視之不見求之上下

人經不同絡脉異所別也

凡此十五大絡之血氣充實則外溢于孫絡皮膚故實則必見虛則下陷于內之大絡故視之不見也求之上下者謂絡脉之交于上下陰陽之間病在上者求之下病在下者求之上病在陰者取之陽病在陽者取之陰也夫十五大絡雖與經相干而布于四末其氣無常處不入于經俞與經脉繆處故與人之經脉不同而絡脉異所別也○尙御公曰經脉有經脉之絡脉經別有經別之絡脉故曰絡脉異所別也

經別第十一

黃帝問于歧伯曰余聞人之合于天道也內有五藏以應五音五色五時五味五位也外有六府以應六律六律建陰陽諸經而合之十二月十二辰十二節十二經水十二時十二經脉者此五藏六府之所以應天道夫十二經脉者人之所以生病之所以成人之所以治病之所以起學之所始工之所止也粗之所易上之所難也請問其離合出入奈何歧伯稽首再拜曰明乎哉問也此粗之所過上之所息也請卒言之

此論十二經脉十五大絡之外而又有經別也五位五
方之定位六律建陰陽者建立六陰六陽以合諸經諸
經者十二經脉十二大絡十二經別也六律分立陰陽
是以合天之十二月十二節十二時合地之十二經水
人之十二經脉此五藏六府之所以應天道也夫六藏
脉屬藏絡府六府脉屬府絡藏此榮血之流行于十二
經脉之中然經脉之外又有大絡大絡之外又有經別
是以粗工爲易而上工之所難也離合者謂三陽之經
別離本經而合于三陰三陰之經別離本經而合于三

陽此卽繆刺篇所當巨刺之經左盛則右病右盛則左
病如此者必巨刺之必中其經非絡脉也按上章之所
謂別者言十二經脉之外而有別絡此章之所謂別者
言十二經脉之外而又有別經此人之所以生此陰陽
血氣病之所以成是動所生及大絡之奇病經別之移
易治之所以分皮刺經刺繆刺巨刺也所生之經絡多
岐所成之病證各別所治之刺法不同故上工之所難
也○尙御公曰五藏爲陰六府爲陽陽者天氣也主外
陰者地氣也主內本篇以六府應六律以合陰陽諸經

蓋五藏內合六府六府外合十二經脉故曰五藏六府之所以應天道○朱永年曰五運行論云在藏爲肝在體爲筋在藏爲肺在體爲皮是五藏之外合于皮肉筋骨也本藏篇曰肺合大腸大腸者皮其應心合小腸小腸者脉其應是五藏內合六府六府外合于皮肉筋骨也蓋五藏六府雌雄相合離合之道通變無窮○高士宗曰太始天元册文曰太虛寥廓肇基化元布氣眞靈總統坤元蓋太始太虛者乃空玄無極之境由無極而生太極太極而分兩儀人雖本天地所生而統歸于天